

# COFRESTRIADAU A CHOFRESTRIADAU HWYR AR GYFER TGAU A SAFON UWCH YNG NGHYMURU: BLWYDDYN ACADEMAIDD 2019/20

## NODIADAU CEFNDIR

Ar 21 Tachwedd 2017, cymeradwyodd Cynulliad Cenedlaethol Cymru [Orchymyn Ystadegau Swyddogol \(Cymru\) 2017](#) a enwodd Cymwysterau Cymru yn un o'r cyrff sydd o fewn cwmpas [Deddf Ystadegau a'r Gwasanaeth Cofrestru 2007](#). Mae Cymwysterau Cymru yn gweithredu mewn cydymffurfiaeth â [Chod Ymarfer Awdurdod Ystadegau'r DU ar gyfer Ystadegau Swyddogol](#) ac mae wedi cyhoeddi'r datganiad ystadegol hwn fel Ystadegau Swyddogol.

### **Diben**

Mae'r datganiad ystadegol hwn yn cyflwyno data ar gofrestriadau a chofrestriadau hwyr ar gyfer arholiadau TGAU, UG a Safon Uwch yng Nghymru yn ystod blwyddyn academaidd 2019/20. Sefydliad aelodaeth yw'r Cyd-bwyllgor Cymwysterau (JCQ) sy'n cynnwys saith darparwr cymwysterau yn y DU, gan gynnwys y rhai sy'n dyfarnu TGAU a Safon Uwch. Mae JCQ yn cyhoeddi dyddiadau cau cofrestru ar ran y byrddau arholi. Os bydd cofrestriad yn dod i law ar ôl y dyddiad cau, ystyrir ei fod yn hwyr a gellir codi tâl ychwanegol mewn perthynas ag ef.

### **Disgrifiad**

Ysgolion a cholegau sy'n gyfrifol am gofrestru eu myfyrwyr TGAU a Safon Uwch gyda byrddau arholi. Caiff myfyrwyr eu cofrestru ar wahân ar gyfer pob uned neu gydran sy'n gwneud cymhwyster. Felly, caiff cofrestriad ei gyfrif fel myfyriwr yn cael ei gyflwyno am asemiad unigol, tra bod tystysgrifau yn cyfeirio at y cymhwyster cyffredinol. Ar gyfer TGAU a Safon Uwch llinol, gwneir cofrestriadau ar lefel cymhwyster. Bydd ysgol neu goleg yn cyflwyno cofrestriadau i'r bwrdd arholi perthnasol ar ran y myfyrwyr. Casglwn ddata dros dro oddi wrth fyrddau arholi pan fydd yn rhesymol gyflawn, er y gall y

niferoedd terfynol sydd wedi cofrestru fod ychydig yn wahanol i'r rhain. Mae TGAU a Safon Uwch wedi bod yn destun newid mawr yng Nghymru. Dechreuwyd cyflwyno cymwysterau UG diwygiedig yn 2015, a gwnaed hynny ar gyfer Safon Uwch yn 2016. Dechreuwyd cyflwyno TGAU diwygiedig yn 2015, gyda'r canlyniadau cyntaf yn cael eu cyhoeddi ar gyfer Saesneg Iaith, Llenyddiaeth Saesneg, Mathemateg, Mathemateg-Rhifedd, Cymraeg Iaith a Llenyddiaeth Gymraeg yn 2017. Cafodd TGAU diwygiedig mewn pynciau eraill eu dyfarnu dros y ddwy flynedd ganlynol.

### **Ffynhonnell Data**

Mae cyrff dyfarnu yn cyflwyno data i ni ar gyfer y TGAU, UG a Safon Uwch maent wedi'u dyfarnu yng Nghymru, yn ogystal â chofrestriadau a chofrestriadau hwyr. Mae cyrff dyfarnu yn anfon data i ni ar gyfer pob cyfres arholiadau. Cysylltir ag unrhyw ddarparwr nad yw'n dychwelyd cyfres lawn o ddata o fewn y cyfnod casglu er mwyn gwneud yn siŵr bod y data mor gyflawn â phosibl. Ar gyfer y datganiad hwn, cawsom ddata gan yr holl gyrff dyfarnu.

Cafodd data eu casglu ar gyfer UG a Safon Uwch ar wahân am y tro cyntaf yn 2016. Felly, yn y cyhoeddiad hwn, cyflwynir data cyn 2016 ar y cyd ar gyfer UG a Safon Uwch. O 2016 ymlaen, lle mae data ar gael, caiff niferoedd UG a Safon Uwch eu cyflwyno ar wahân yn y tablau.

### **Cyfyngiadau'r data**

Mae camgymeriadau posibl yn y wybodaeth a ddarparwyd gan gyrff dyfarnu. Felly, ni all Cymwysterau Cymru sicrhau bod y wybodaeth a gafwyd yn gywir. Mae Cymwysterau Cymru yn cymharu'r data dros amser ac yn gwirio ar gyfer problemau systematig. Cynhelir gweithdrefnau sicrhau ansawdd i sicrhau cywirdeb y data a'u herio neu eu cwestiynu, lle bo angen. Mae Cymwysterau Cymru yn rheoli'r broses hon yn barhaus drwy wneud y canlynol:

- Sicrhau bod darparwyr data yn glir ynghylch yr hyn sy'n ofynnol ganddynt ac yr ymgynghorir yn llawn â nhw yn ystod y cyfnodau cynllunio cychwynol ac unrhyw gyfnodau newid dilynol;
- Atgoffa pob darparwr (os yw'n briodol) bod yn rhaid i'r holl ddata fod yn hollol gywir fel amod eu bod yn cael eu rheoleiddio;
- Bod yn wiliadwrus o newidiadau annisgwyl yn y data a gyflwynir drwy gymharu ffurflenni unigol dros amser gan yr un darparwr;
- Herio unrhyw ganlyniadau annisgwyl gyda'r darparwyr data.

Gellir gohirio'r cyhoeddiad os nad yw'r ystadegau yn cael eu hystyried yn addas at y diben.

Mae data wedi cael eu casglu ar bwynt priodol pan fydd wedi'i gwblhau'n rhesymol. 3 Ionawr 2020 oedd hyn ar gyfer cyfres arholiadau mis Tachwedd 2019, 26 Chwefror ar gyfer cyfres arholiadau Ionawr 2020 a 2 Hydref ar gyfer cyfres arholiadau Mehefin 2020.

## **Cymariaethau**

O fis Tachwedd 2017, cyflwynodd cyrff dyfarnu ddata i Cymwysterau Cymru yn hytrach nag Ofqual. Dylid cymryd gofal wrth ddehongli cymariaethau â data Ofqual hanesyddol.

Y diffiniad o gofrestriad hwyr at ddibenion ystadegol yw cofrestriad a ddaeth i law ar ôl hanner nos ar y dyddiad cau ar gyfer pob cyfres arholiadau. Nid oedd y data a gyflwynwyd yn flaenorol gan CBAC yn defnyddio'r diffiniad hwn. Mae'r data yn y datganiad hwn yn defnyddio data CBAC sydd wedi'u cywiro yn defnyddio'r diffiniad hwn. Nid yw'r diffiniad o gofrestriadau hwyr a ddefnyddir at ddibenion ystadegol yn golygu bod yn rhaid i ganolfannau dalu ffi i'r corff dyfarnu am bob un o'r cofrestriadau hwyr hyn. Mae gan gyrff dyfarnu ddyddiadau gwahanol y codir ffi hwyr ar eu hôl ac, felly, nid yw'r ystadegau ar gyfer cofrestriadau hwyr o reidrwydd yn cynrychioli nifer y cofrestriadau y codwyd ffi hwyr mewn perthynas â nhw.

Mae'r datganiad hwn yn cynnwys data a allai fod wedi ei effeithio gan ganslo arholiadau haf 2020 o ganlyniad i bandemig COVID-19. Gall patrymau cofrestriadau yn 2020 fod yn wahanol i flynyddoedd blaenorol ac efallai na fyddant yn gynrychioliadol o sut y byddai cofrestriadau wedi edrych pe bai arholiadau wedi mynd rhagddynt fel arfer. Dylai defnyddwyr ddehongli gwahaniaethau rhwng haf 2020 a chyfresi eraill yn ofalus.

Ers 31 Mai 2020, nid yw CCEA bellach yn cael ei reoleiddio gan Cymwysterau Cymru ond mae eu ffigurau hanesyddol wedi'u cynnwys er mwyn bod yn gyflawn.

## **Cwmpas Daeryddol**

Mae'r datganiad hwn yn cyflwyno data ar nifer y cofrestriadau, cofrestriadau hwyr a thystysgrifau ar gyfer TGAU, UG a Safon Uwch yng Nghymru.

## **Diwygiadau**

Unwaith y byddant wedi'u cyhoeddi, nid yw data ar nifer y cofrestrïadau fel arfer yn cael eu hadolygu, er y gall datganiadau dilynol gael eu hadolygu i gynnwys data hwyr neu gywiro camgymeriad. Ar gyfer y datganiad hwn nodwyd sawl gwall. Mae'r gwallau hyn wedi'u cywiro a defnyddir y symbol (r) i'w nodi yn y tablau.

### **Cyflawnrwydd y data**

Rydym yn cysylltu ag unrhyw gorff dyfarnu nad yw'n dychwelyd cyfres lawn o ddata o fewn y cyfnod casglu, i wneud yn siŵr bod y data mor gyflawn â phosibl.

### **Talgrynnu a Chyfrinachedd**

Er mwyn diogelu cyfrinachedd, ac yn unol â pholisi interim allbynnau ystadegol Cymwysterau Cymru, caiff yr holl ffigurau eu talgrynnu. Yn y sylwadau a'r tablau, maent wedi'u talgrynnu i'r 5 agosaf. Rhoddir \* yn lle ffigurau llai na 5 ond mwy na 0. Mae hyn er mwyn sicrhau nad yw'r data yn datgelu ymgeisydd unigol. Mae'r holl ganrannau o fewn y sylwadau yn seiliedig ar ffigurau gwirioneddol. Mae'r ffigurau wedi'u talgrynnu'n annibynnol ac felly mae'n bosibl na fyddant yn symio i'r cyfanswm.

### **Defnyddwyr yr ystadegau hyn**

Mae'r ystadegau hyn yn debygol o fod o ddiddordeb i Cymwysterau Cymru, cyrff dyfarnu a Llywodraeth Cymru. Rydym yn croesawu adborth gan ddefnyddwyr er mwyn meithrin gwell dealltwriaeth o bwy yw ein defnyddwyr dros amser.

### **Ystadegau a chyhoeddiadau cysylltiedig**

Mae nifer o ddatganiadau ystadegol yn ymwneud â'r datganiad hwn, gan gynnwys y canlynol:

- [Datganiad ystadegol cofrestrïadau mis Tachwedd, a chofrestrïadau'r haf ar gyfer Cymru](#) a gyhoeddwyd gan Cymwysterau Cymru.
- [Datganiad ystadegol cofrestrïadau a chofrestrïadau hwyr a gyhoeddwyd gan Ofqual.](#)
- [Y datganiad 'Canlyniadau'r cyfrifiad ysgolion', a gyhoeddwyd gan Lywodraeth Cymru.](#)

### **Gwybodaeth ddefnyddiol**

Ceir gwybodaeth am gyhoeddiadau yn y dyfodol ar [wefan Llywodraeth Cymru](#).

Mae'r gofrestr [QiW](#) yn rhoi gwybodaeth am gymwysterau cymeradwy a dynodedig sy'n gymwys i gael arian cyhoeddus yng Nghymru.

### **Y diweddariad nesaf**

Tachwedd 2021 (dros dro).

### **Adborth gan ddefnyddwyr**

Rydym yn croesawu adborth ar unrhyw agwedd ar yr ystadegau hyn, a gellir ei ddarparu drwy e-bost i [statistics@qualificationswales.org](mailto:statistics@qualificationswales.org).

*(h) (2019) Rhoddir caniatâd i'w atgynhyrchu ar yr amod y cyfeirir at Cymwysterau Cymru fel y ffynhonnell wreiddiol.*